

Date – 29/06/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. Mizoram Legislative Assembly Deputy Speaker Pu Lalfamkima chuan Mizoramah Remna a awm hnuah chuan hlauhna tellovin Mizoram chuan ropui zawngin hmalam a pan mek, a ti.
2. National Statistics Day pualin ICT Minister Dr Vanlalhlalan Mizoram Civil Registration System (CRS) Portal a tlangzarh.
3. President Droupadi Murmu-i chuan vawiin tlai khan Rashtrapati Bhavan-ah sipai huaissen chawimawina Gallantry award 2026 a sem
4. United States leh Iran chuan inkap chhonzawm tawh lova naktuka Doha khawpuia inbiak an remti.

<><><>

REMNA NI

Mizoram Legislative Assembly Deputy Speaker Pu Lalfamkima chuan Mizoramah Remna a awm hnuah chuan hlauhna tellovin Mizoram chuan ropui zawngin hmalam a pan mek, a ti.

Mizoram Peace Accord vawi 40-na puala vawiina Zoram Research Foundation leh NCCI hnuaia India Peace Centre leh Aijal Club- ten ‘40 Years of Harmony: Legislative Dialogue on Peace Building’ tih thupui hmangin sawihona an buatsaih a hmanpuinaah he thu hi sawiin, Pu Lalfamkima chuan Inremna a awm theihna atana thawktu hruaitu hmasa: Pu Rajiv Gandhi-a te, Pu Laldenga te, ram hruaitute leh kohhran khawtlang hruaitute inpekna thuk tak vang a ni, a ti.

Deputy Speaker chuan he Mizoram Peace Accord hi khawvel hriatah pawh chhuanawm tham a nih thu sawiin, Peace Accord dang hlawhchham tam tak karah Mizo Peace Accord erawh nghet takin a ding zel a ni, a ti a. He Peace Accord hlutzia hre reng chung a vawnhim hna thawh zel chu an mawhpurhna a nih thu MLA leh MLA hlui kalkhawmte hnenah a sawi bawh a ni.

He hunah hian MLA leh MLA hlui kalkhawmte chuan kum 40 liam taa Mizoram Peace Accord ziah a nih atanga tun thlenga Mizoramin remna tluantling a neih dante, inremna ngelnghet avanga kum 40 chhunga kawng hrang hranga Mizoram dinhmun te leh remna boruak hnuaia Mizoram than zelnat tur leh hmasawnna tur kawngte an sawiho a. Remna leh muanna derthawnzia hre reng chungin kum 40 chhung kan lo vawnhim tawh inremna chu chhawm nung zel turin mipui aiawha thlan MLA te pawimawhna pawh an sawiho bawka ni.

Remna Ni hi naktukah Mizo Zirlai Pawl (MZP) bultumin LPS Arena ah hman a ni dawn a Home Minister Pu K Sapdanga'n khuallian niin a hmanpui ang.

Kan corr report ngaithla ang.

VC

Remna Ni lawm chungchangah hian sorkarna fawng vuatu political party a zirin a changin lawm a ni a, a changin lawm a ni ngai lo a, hemi chungchangah hian MZP chuan Remna Ni hi lawm ngei tha a tih avangin kum 2018 atang khan Remna Ni lawmna hi an kutken taa, sorkarin a tul angin a pui thin a ni.

Naktuka MZP buatsaih Remna Ni lawmna turah hian MZP President Pu C Lalremruata chuan thuchah tichhuakin, Remna Ni lawmnaah hian tel theuh turin Mizo mipui a sawm a; remna leh muanna awm theih nana thawktah an thlan Rev. Dr. CL Hminga hnenah chawimawina an hlan dawn a ni.

<><><>

AMC

Aizawl Municipal Corporation chuan vawiin khan kum 2026-27 chhung atana an budget tur cheng nuai 12,754 sing 9 sang 3 a pawm a; an budget-ah hian cheng nuai 10,087 sang 6 & 200 chu hmasawnna hna thawhna tur atana dah niin, hei hi budget atangin za zela 79.09 a ni.

AMC executive corporator (cash & accounts) Pi Christina Roluahpuii Sailo chuan vawiin khan a pisaah thuthar thehdarhtute kawmin, AMC-a ZPM sorkar chuan an manifesto mila budget an ruahman thu a sawi a, an manifesto angte vawi leh khatah tih hlawhtlin vek theih ni lo mah se, budget-ah an manifesto tih hlawhtlinna tura an ngaih pawimawh zualteah hma an lak hmasak dawn thu a sawi.

(Byte - Christina Roluahpuii Sailo)

Pi Christina-i chuan, AMC sorkar tharin thla 1 vel leka budget an pharh thei chu lawmawm a tih thu a sawi a, an budget estimate chu nikum (2025-2026) budget estimate aiin cheng nuai 1,537.04 in a tam zawk tih sawiin, AMC chuan Aizawl mipuite tan theihtawp an chhuah zel dawn tih a sawi bawka.

<><><>

MCU

Mizoram Consumers' Union (MCU) chuan sorkar laipui scheme pakhat hnuaia a thlawna Aadhar siam hna chu Mizoramah chuan man chawia tih a ni chu dan a ni lo a ti.

Kan corr report ngaithla ang.

VC

Mizoram Consumers’ Union thuchhuah tarlan danin Sawrkar laipua Unique Identification Authority of India (UIDAI) chuan, Sept. 29, 2025 khan mipui hnena hriattur thu ti chhuakin, naupang kum 5 atanga kum 7 inkar te, a vawi khatna atan, an hamthatna tura Adhaar number nei vek turin a ti a. Hei bakah hian, kum 15 atanga kum 17 inkarah an Adhaar hi tihnun leh update ngei ngei tura tih a ni a. He scheme hi October ni 1, 2025 atanga Oct. 1, 2026 (kum khat) chhungin a thlawn a ram puma naupang vaibelchhe ruk te’n hamthatna an dawn theihna tur a ni.

Mizoram chuan zirna in hrang hrangah hemi hi Edn Dept -in hma lain a kalpui mek a, hemi tih man hi naupang pakhat zelah 100/- lâk thin ni a report an dawng tih MCU chuan sawiin hei hi Mizoram Sawrkara Edn Dept-a thuneitu te’n dan anga kalpui turin an ngen a, pawisa lo lak tawh te pawh pe kîr leh vek turin an ngen tih an sawi a ni.

BYTE (Thanglura President)

MCU President Pu Thanglura chuan Aadhar siam man lak chungchang hi an hriat tlai thu leh, a nawlpui chu an zawh hman tawh thu sawiin an buaipui zui dawn tih a sawi a ni.



NATIONAL STATISTICS DAY

Vawiin National Statistics Day pualin Information & Communication Technology (ICT) Department Minister Dr Vanlalthlanan ICT leh Directorate of Economics & Statistics thawk duna an siam, Mizoram Civil Registration System (CRS) Portal a tlangzarh.

CRS hi Mizoram puma Piang leh Thi chhinchhiahna tura siam a ni a, Central Sorkar CRS Portal nena inchawmtawn thei tura duan niin, MeitY Empanelled CSP hnuaiah Cloud leiin he Portal hi siam a ni.

Dr Vanlalthlana chuan khawvel thang zel leh changkang zelah Data leh Statistics pawimawhna a lang Chiang telh telh a ni a ti a. Sawrkar tha taka a kal theihnan data dik sawrkarin a mamawh a, thuthlukna fel leh dik siamnana pawimawh ber pakhat a nih thu a sawi bawk. Minister chuan data dik neih mai bakah data phena thil thlen chhan chhui a pawimawh tel thu a sawi bawk a ni.

National Statistics Day chu Khawzawlah pawh District Research Office, Khawzawl bultumin Khawzawl Higher Secondary School-ah hman a ni a, zirlaite hnenah Administrative Data pawimawhna te sawifiah a ni a, zawhna leh chhanna hun te an hmang zui a ni.

Khawzawl HSS a Economics leh Commerce zirlaite an tel a ni.



VB G RAM G

Thla thar July lo thleng mai tur a hman tur, VB-G RAM G atan Central Sawrkar in Mizoram tan cheng vbc 611 leh nuai 65 a pe chhuak tawh a, State Matching Share cheng vbc 67 leh nuai 95 pawh State Sawrkar in a ti fel tawh a ni.

He thu hi vawiina New delhi-a Rashtriya Gramin Vikas Sammelan ah tarlan a ni a, sorkar laipui Ministry of Rural Development-in MGNREGA thlaktu, thingtlang mipui te inhlawhna tura pek, Viksit Bharat - Guarantee for Rozgar and Aajeevika Mission Gramin (VB-GRAMG) te, thingtlang nuho hmasawnna tur Programme - National Rural Livelihood Mission leh Pradhan Mantri Awaas Yojana-Gramin leh Scheme dangte he hunah hian sawiho a ni a, , Union Minister of Rural Development Pu Shivraj Singh Chouhan-an a ho a, state sorkar Rural Development and Administration Department Minister Prof Lalnilawma pawh a tel ve a ni.

Prof Lalnilawma chuan Mizoram chu State Scheme siam hmasa ber a nih thu leh State Rules hrang hrang pawh a ruangam peih vek a ni tawh thu te, internet connectivity chiang kuang lo chung a e-KYC leh Face Authentication ah te Mizoram chu a sang pawl an nih thu te sawiin, MGNREGA hnuaia contractual staff te hlawh, Central liability te chinfel a nih vat theih nan Ministry of Rural Development hotute a ngen a, MGNREGA ang bawka VB-GRAMG chu tangkai taka mipuiin an hman zel a beisei thu te a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

BJP

Mizoram sorkarin central project do letna tur 10% Matching Share a do tak ngial pawh a neih theih loh lai a, sorkar in mipui hnen a, a theih ang anga chhiah lak dan tur an dap ruai chuan hmalam hun thim zia a tilang chiang hle tih BJP Mizoram State Vice President, Pu Lalduhawma Pachuau chuan a sawi.

He thu hi vawiina Karthar Inhlanna leh Political Session, BJP Mizoram State Office, Mipui Rûn, Upper Republic-a hun an hmannah sawiin BJP Mizoram Vice President chuan he ti ringawt maia Sorkar a kal ta mai hi a luhai thlak in, ngun taka a inngaihtuah a ngai ta niin a lang a ti a, Mizoram a Development hnathawh a chawlh deuh ðup chhan chu, Development hnathawhna tur sum an hai chhuah hleihtheih loh bakah, Central Project do let ve na tur Matching Share 10% a pek hleithei loh vang niin mi thiamten an sawi a ti.

Pu Lalduhawma chuan CADC-ah BJP leh ZPM thawhdunna ða tak an nei thei chu a lawmawm tih sawiin, Mizorama Politician Senior, Minister pawh lo ni tawh, Central lamah pawh chanvo lian tak chelh tawhtu, Pu Nirupam Chakma, CEM a ni hian CADC tan hmasawnna ða tak a thlen an beisei thu sawiin , BJP Mizoram chuan CADC Sorkar thar BJP leh ZPM Sorkar inñawm chu an lawmpui takzet a ni a ti.

<><><>

PRESIDENT

President Droupadi Murmu-i chuan vawiin tlai khan Rashtrapati Bhavan-ah sipai huaissen chawimawina Gallantry award 2026 a sem a. President Murmu-i hian Defence Forces, Central Armed Police Force leh State/UT Police te hnenah chawimawina hi a hlan a ni. Air Marshal Tarun Chaudhary, Lieutenant General Neeraj Varshney, Lieutenant General Vikas Rohella, Lieutenant General Harbinder Singh Vandra leh Lieutenant General Mohinder Pal Singh te chu Ati Vishisht Seva Medal hlan an ni a. He hunah hian Vice President C P Radhakrishnan leh Union Minister engemawzat an tel a ni.

Tun thla ni 8 khan President Murmu-I hian Gallantry Award sem thawhkhathnaah mi 51 hnenah chawimawina a lo hlan tawh a ni.

<><><>

US

United States leh Iran chuan inkap chhonzawm tawh lova naktuka Doha khawpuia inbiak an remti. Sipai inepna boruak inmung chho mek avangin tunhnaia inkahhai an puan pawh a dinhmun derthawng tawh hle a. He an inbiakna tur hi Strait of Hormuz-a an buaina chinfelna tur kawng pawimawh taka ngaih a ni a. Strait of Hormuz-ah an inkah hnu lawkah hetiang hian hmalak anih thu hi an puang a ni.

Iran hian sumdawn lawng an kah avangin US hian chhangletin Iran sipai hmunpui engngemawzat a kap a. Hei hi Iran hian chhanglet lehin Bahrain leh Kuwait-a US sipaite inkulhna a bei chhonzawm veleh a. Hemi hnu hian boruak a san zel loh nan inbiak hi an remti ta a. US thuneitute chuan inbiakna a kal chhung hian zalen takin lawng an veivak thei ang tih an sawi a ni.

<><><>